

# INUIT ATAQATIGIIT

## INATSISARTUNI



UKA2015/60  
5. november 2015  
Naaja H. Nathanielsen

**Siunnersuut uunga: Naalackersuisut aatsitassanut inatsisip allannguutissaanik, annikitsuinnarmik misissuinissamut aamma piiaanissamut akuersissut inunnut Kalaallit Nunaanni najugaqavissunut tamakkiisumillu akileraartussaataitasunut aammalu Kalaallit Nunaanni ukiuni qulini inuit allattorsimaffianni nalunaarsorsimallutik najugaqareersimasunut aamma Kalaallit Nunaanni ukiuni qulini tamakkiisumik akileraartussaataareersimasunut taamaallaat tunniunneqarsinnaasunngorlugu, UKA 2016-imut saqqummiinissamut Naalackersuisut peqquneqarnissaannik Inatsisartunut aalajangiiffigisassatut siunnersuut.**

(Inatsisartunut ilaasortaq Anthon Frederiksen Partii Naleraq)

Annikitsuinnarmik misissuinissanut piiaanissanullu akuersissutinik qinnuteqarsinnaanermut innuttaasut periarfissaat pillugit maleruagassat sukaterneqarnissaat Partii Naleqqamit kissaatigineqarpoq. Ullumikkut pissutsit imaapput qinnuteqarniaraanni nunatsinni ukiuni kingullerni tallimani najugaqarsimanissaq nunatsinnilu akileraartarsimanissaq piunasaqaataallutik. Taamaattoqarsimanngippat akuersissummik pisoqarsinnaanngilaq. Akuersissummillu tunineqarsimasup nunarput qimappagu nunatsinnilu akileraartarunnaarpat akuersissut atorunnaarsinneqassalluni. Piunasaqaatip ukiunit tallimanit ukiunut qulinut sivitsorneqarnissaa Partii Naleqqamit kissaatigineqarpoq.

Annikitsuinnarmik misissuinernik piiaanernillu ingerlatsisut ukiuni arlaqartuni nunatsinnut pimoorussamik attuumassuteqarsimanissaannik piunasaqaat Inuit Ataqatigiinni pissusissamisoortutut isigaarput. Isumaqarpugut annikitsuinnarmik misissuinissanut piiaanissanullu akuerineqarnissamut ukiuni tallimani nunatsinni najugaqarsimanissamik piunasaqaataasooq naleqquttuusoq. Piunasaqaataasup ukiut tallimanit qulinut sivitsornissaata innuttaasunut iluaqutaanissaa qularivarput. Innuttaaqativut ukiut arfinillit arfineq marlulluunniit nunani allani najugaqarsimagaluarunilluunniit aatsitassarsiornernut suliniutaasunut akuutinneqarsinnaasariaqarput. Innuttaaqatitta amerlanerusut aatsitassarsiornerni, taamatullu aamma annikitsuinnarmik misissuinerni piiaarnernilu, akuulernissaat uagut kissaatigisaraarput.

Partii Naleraq isumaqarpoq pisuussutitta inunnut sivikitsuinnarmik nunatsinni najugaqareerlutik qimaguttussanut tunniussorneqarnissaat navianartutut isigisariaqartoq. Inuit Ataqatigiinni isumaqarpugut tamassuma ajornartorsiutigineqarsinnaanera piareersimaffigineqareersoq. Inatsimmi atuuttumi nunatsinnut attuumassuteqarnermut maleruagassatigut tamassuma sukannersumik piunasaqaateqarneq qulakkeereerneqareersoq isumaqarpugut, tamannalu nuannaarutigaarput.

Maleruagassat ullumikkut atuuttut innuttaasunut illersuisuunerat, taamatullu naammagi-nartumik sukaterneqarsimaneri pioreersutut isumaqarfigigatsigu matumani Partii Naleqqamit siunnersuutigineqartoq itigartikkusupparput.